

四庫全書

史部

欽定四庫全書

史部

繹史卷一百

二十一
二十二

詳校官檢討

臣羅國俊

編修

臣

裴謙

覆勘

覆校官博士

臣

劉光第

校對官中書

臣

田尹衡

謄錄舉人

臣

陳賓

欽定四庫全書

· 經史卷一百二十

靈壁縣知縣馬驥撰

張儀相秦連衡

公孫衍相魏

陳軫田需並附

史記秦惠文君五年陰晉人犀首為大良造 張儀者

魏人也始嘗與蘇秦俱事鬼谷先生學術蘇秦自以不
及張儀張儀已學而游說諸侯嘗從楚相飲已而楚相
亡壁門下意張儀曰儀貧無行必此盜相君之壁共執
張儀掠笞數百不服醪之其妻曰嘻子毋讀書游說安

得此辱乎張儀謂其妻曰視吾舌尚在不其妻笑曰舌在也儀曰足矣蘇秦已說趙王而得相約從親然恐秦之攻諸侯敗約後負念莫可使用於秦者乃使人微感張儀曰子始與蘇秦善今秦已當路子何不往游以求通子之願張儀於是之趙上謁求見蘇秦蘇秦乃誡門下人不為通又使不得去者數日已而見之坐之堂下賜僕妾之食因而數讓之曰以子之材能乃自令困辱至此吾寧不能言而富貴子子不足收也謝去之張儀

之來也自以為故人求益反見辱怒念諸侯莫可事獨
秦能苦趙乃遂入秦蘇秦已而告其舍人曰張儀天下
賢士吾殆弗如也今吾幸先用而能用秦柄者獨張儀
可耳然貧無因以進吾恐其樂小利而不遂故召辱之
以激其意子為我陰奉之乃言趙王發金幣車馬使人
微隨張儀與同宿舍稍稍近就之奉以車馬金錢所欲
用為取給而弗告張儀遂得以見秦惠王惠王以為客
卿與謀伐諸侯蘇秦之舍人乃辭去張儀曰賴子得顯

方且報德何故去也舍人曰臣非知君知君乃蘇君蘇君憂秦伐趙敗從約以為非君莫能得秦柄故感怒君使臣陰奉給君資盡蘇君之計謀今君已用請歸報張儀曰嗟乎此吾在術中而不悟吾不及蘇君明矣吾又新用安能謀趙乎為吾謝蘇君蘇君之時儀何敢言且蘇君在儀寧渠能乎

呂氏春秋張儀魏氏餘子也將西游於秦過東周客有語之於昭文

君者曰魏氏人張儀材士也將西游於秦願君之禮貌之也昭文君見而謂之曰聞客之秦寡人之國小不足以留客雖游然豈必遇哉客或不遇請為寡人而一歸也國雖小請與客共之張儀還走北面再拜張儀行昭

文君送而資之至於秦留有間惠王說而相之張儀所德於天下者無若昭文君周千乘也重過萬乘也今秦惠王師之逢澤之會魏王嘗為御韓王六年魏納陰晉為右名號至今不忘此張儀之力也

陰晉更名寧秦 八年魏納河西地九年渡河取汾陰

皮氏與魏王會應圍焦降之

戰國策楚攻魏張儀謂秦王曰不如與魏以勁之魏

戰勝復聽於秦必入西河之外不勝魏不能守王必取之王用儀言取皮氏卒萬人車百乘以與魏犀首戰勝威王魏兵罷敝恐畏秦果獻西河之外 秦惠王十年使公子華與張儀圍

蒲陽降之儀因言秦復與魏而使公子繇質於魏儀因說魏王曰秦王之遇魏甚厚魏不可無禮魏因入上郡

少梁謝秦惠王惠王乃以張儀為相更名少梁曰夏陽
張儀既相秦為文檄告楚相曰始吾從若飲我不盜
而譬若答我若善守汝國我顧且盜而城

戰國策陳軫去楚之秦張儀謂秦王曰陳軫為王臣常
以國情輸楚儀不能與從事願王逐之即復之楚願王
殺之王曰軫安敢之楚也王召陳軫告之曰吾能聽子
子欲何之請為子約車對曰臣願之楚王曰儀以子為
之楚吾又自知子之楚子非楚宜安之也軫曰臣出必

故之楚以順王與儀之策而明臣之楚與否也楚人有
兩妻者人詭長者長者詈之詭其少者少者許之居無
幾何有兩妻者死客謂詭者曰汝取長者乎少者乎取
長者客曰長者詈汝少者和汝汝何為取長者曰居彼
人之所則欲其許我也今為我妻則欲其為詈人也今
楚王明主也而昭陽賢相也軫為人臣而常以國情輸
楚楚王必不留臣昭陽將不與臣從事矣以此明臣之
楚與不軫出張儀入問王曰陳軫果安之王曰夫軫天

下之辯士也熟視寡人曰軫必之楚寡人遂無奈何也寡人因問曰子必之楚也則儀之言果信也軫曰非獨儀之言行道之人皆知之昔者子胥忠其君天下皆欲以為臣孝已愛其親天下皆欲以為子故賣僕妾不出里巷而取者良僕妾也出婦嫁於鄉里者善婦也臣不忠於王楚何以軫為忠忠且見棄軫不之楚而何之乎王以為然遂善待之田華之為陳軫說秦惠王曰臣恐王之如郭君夫晉獻公欲伐郭而憚舟之僑存荀息

曰周書有言美女破舌乃遺之女樂以亂其政舟之僞
諫而不聽遂去因而伐郭遂破之又欲伐虞而憚宮之
奇存荀息曰周書有言美男破老乃遺之美男教之惡
宮之奇宮之奇以諫而不聽遂亡因而伐虞遂取之今
秦自以為王能害王者之國者楚也楚知橫門君之善
用兵與陳軫之智故驕張儀以五國來必惡是二人願
王勿聽也張儀果來辭因言軫也王怒而不聽

史記陳軫者游說之士與張儀俱事秦惠王皆貴重爭

寵張儀惡陳軫於秦王曰軫重幣輕使秦楚之間將為國交也今楚不加善於秦而善軫者軫自為厚而為王薄也且軫欲去秦而之楚王胡不聽乎王謂陳軫曰吾聞子欲去秦之楚有之乎軫曰然王曰儀之言果信矣軫曰非獨儀知之也行道之士盡知之矣昔子胥忠於其君而天下爭以為臣曾參孝於其親而天下願以為子故賣僕妾不出閭巷而售者良僕妾也出婦嫁於鄉曲者良婦也今軫不忠其君楚亦何以軫為忠乎忠且

見棄軫不之楚何歸乎王以其言為然遂善待之居秦
期年秦惠王終相張儀而陳軫奔楚楚未之重也而使
陳軫使於秦過梁欲見犀首犀首謝弗見軫曰吾為秦
來公不見軫軫將行不得待異日犀首見之陳軫曰公
何好飲也犀首曰無事也曰吾請令公饜事可乎曰奈
何曰田需約諸侯從親楚王疑之未信也公謂於王曰
臣與燕趙之王有故數使人來曰無事何不相見願謁
行於王王雖許公公請毋多車以車三十乘可陳之於

庭明言之燕趙燕趙客聞之馳車告其王使人迎犀首
楚王聞之大怒曰田需與寡人約而犀首之燕趙是欺
我也怒而不聽其事齊聞犀首之北使人以事委焉犀

首遂行三國相事皆斷於犀首

戰國策陳軫為秦使於齊過魏求見犀首犀首

謝陳軫陳軫曰軫之所以來者事也公不見軫軫且行
不得待異日矣犀首乃見之陳軫曰公惡事乎何為飲
食而無事犀首曰衍不肖不能得事焉何敢惡事陳軫
曰請移天下之事於公犀首曰奈何陳軫曰魏王使李
從以車百乘使於楚公可以居其中而疑之公謂魏王
曰臣於燕趙故矣數令人召臣也曰無事必來今臣無
事請謁而往無久旬五之期王必無辭以止公公得行
因自言於庭曰臣急使燕趙急約車為行具犀首曰諾

謁魏王魏王許之即明言使燕趙諸侯客聞之皆使人告其王曰李從以車百乘使楚犀首以車三十乘使燕趙齊王聞之恐後天下得魏以事屬犀首犀首受齊事魏王止其使燕趙間之亦以事屬犀首楚王聞之曰李從約寡人今燕齊趙皆以事因犀首犀首必欲寡人寡人欲之乃倍李從而以事因犀首魏王曰所以不使犀首者以為不可今四國屬以事寡人亦以事因焉犀首遂主天下之事復相魏齊王將見燕趙楚之相於衛約外魏魏王懼恐其謀伐魏也告公孫衍公孫衍曰王與臣百金臣請敗之王為約車載百金犀首期齊王至之日先以五十乘至衛間齊行人以百金以請先見齊王乃得見因久坐安從容談二國之相怨謂齊王曰王與三國約外魏魏使公孫衍來今久與之談是王謀三國也齊王曰魏王聞寡人來使公孫子勞寡人寡人無與之語也三國之相不信齊王之遇遇事遂敗

十一年縣義渠歸魏焦曲沃

義渠君為臣

十二年初臘

表云會龍門

儀相秦四歲立

惠王為王居一歲為秦將取陝築上郡塞十三年四

月戊午魏君為王韓亦為王使張儀伐取陝出其人與

魏十四年更為元年楚懷王六年楚使柱國昭陽

將兵而攻魏破之於襄陵得八邑

○事當秦惠王後二年

戰國策昭陽為楚伐魏覆軍殺將得八城移兵而攻齊

陳軫為齊王使見昭陽再拜賀戰勝起而問楚之法覆

軍殺將其官爵何也昭陽曰官為上柱國爵為上執珪

陳軫曰異貴於此者何也曰唯令尹耳陳軫曰令尹貴矣王非置兩令尹也臣竊為公譬可也楚有祠者賜其舍人卮酒舍人相謂曰數人飲之不足一人飲之有餘請畫地為蛇先成者飲酒一人蛇先成引酒且飲乃左手持卮右手畫蛇曰吾能為之足未成一人之蛇成奪其卮曰蛇固無足子安能為之足遂飲其酒為蛇足者終亡其酒今君相楚而攻魏破軍殺將得八城不弱兵欲攻齊齊畏公甚公以是為名亦足矣官之上非可重也

戰無不勝而不知止者身且死爵且後歸猶為蛇足也
昭陽以為然解軍而去

史記二年張儀與齊楚大臣會齧桑 三年韓魏太子

來朝張儀相魏 使與齊楚之相會齧桑東還而免相

相魏以為秦欲令魏先事秦而諸侯效之魏王不肯聽

儀秦王怒伐取魏之曲沃平周復陰厚張儀益甚張儀

慙無以歸報

論衡張儀此
脇亦相秦魏

戰國策張儀欲以魏合於秦韓而攻齊楚惠施欲以魏

合於齊楚以案兵人多為張子於王所魏惠子謂王曰
小事也謂可者謂不可者正半況大事乎以魏合於秦
韓而攻齊楚大事也而王之羣臣皆以為可不知是其
可也如是其明邪亡羣臣之智術也如是其同邪是其
可也未知是其明也而羣臣之智術也又非皆同也是
其有半塞也所謂劫王者失其半者也

韓非子張儀欲以秦韓與魏之勢伐齊荆而惠施欲以
齊荆偃兵二人爭之羣臣左右皆為張子言而以攻齊

荆為利而莫為惠子言王果聽張子而以惠子言為不
可攻齊荆事已定惠子入見王言曰先生毋言矣攻齊
荆之事果利矣一國盡以為然惠子曰說不可不察也
夫齊荆之事也誠利一國盡以為利是何智者之衆也
攻齊荆之事誠不利一國盡以為利何愚者之衆也凡
謀者疑也疑也者誠疑以為可者半以為不可者半今
一國盡以為可是王亡半也劫主者固亡其半者也。

文。

於策
為暢

戰國策張儀欲窮陳軫令魏王召而相之來將倍之將
行其子陳應止其公之行曰物之湛者不可不察也鄭
彊出秦曰應為智夫魏欲絕楚齊必重迎公郢中不善
公者欲公之去也必勸王多公之車公至宋道稱疾而
毋行使人謂齊王曰魏之所以迎我者欲以絕齊楚也
齊王曰子東無之魏而見寡人也請封子因以魯侯之
車迎之 楚王遂張儀於魏陳軫曰王何遂張子曰為
臣不忠不信曰不忠王無以為臣不信王勿與為約且

魏臣不忠不信於王何傷忠且信於王何益逐而聽則可若不聽是王今困也且使萬乘之國免其相是城下之事也

史記留魏四歲而魏襄王卒哀王立張儀復說哀王哀

王不聽於是張儀陰令秦伐魏魏與秦戰敗

紀年魏惠王卒襄

王立也無哀王之世

七年樂池相秦韓趙魏燕齊帥匈奴共攻

秦蘇秦約從山東六國共攻秦楚懷王為從長至函

谷關秦出兵擊六國六國兵皆引而歸齊獨後

按是時蘇秦

齊在

戰國策五國伐秦魏欲和使惠施之楚楚將入之秦而使行和杜赫謂昭陽曰凡為伐秦者楚也今施以魏來而公入之秦明楚之伐而信魏之和也公不如無聽惠施而陰使人以請聽秦昭子曰善因謂惠施曰凡為攻秦者魏也今子從楚為和楚得其利魏受其怨子歸我將使人因魏而和惠子反魏王不說杜赫謂昭陽曰魏為子先戰折兵之半謁病不聽請和不得魏折而入齊

秦子何以救之東有越累北無晉而交未定於齊秦是
楚孤也不如速和昭子曰善因令人謁和於魏 五國
約以伐秦昭陽謂楚王曰五國已破秦必南圖楚王曰
然則奈何對曰韓氏輔國也好利而惡難好利可營也
惡難可懼也我厚賂之以利其心必營我悉兵以臨之
其心必懼彼懼吾兵而營我利五國之事必可敗也約
絕之後雖勿與地可楚王曰善乃命大公事之韓見公
仲曰夫牛欄之事馬陵之難親主之所見也王苟無以

五國用兵請効列城五請悉楚國之衆以圖於齊齊人
反趙魏之後而楚果弗與地則五國之事困也五國
約而攻秦楚王為從長不能傷秦兵罷而留於成皐魏
順謂沛邱君曰五國罷必攻沛邱以償兵費君資臣臣
請為君止天下之攻沛邱君曰善因遣之魏順南見楚
王曰王約五國而西伐秦不能傷秦天下且以是輕王
而重秦故王何不卜交乎楚王曰奈何魏順曰天下罷
必攻沛邱以償兵費王令之勿攻沛邱五國重王且聽

王之言而不攻沛邱不重王且反王之言而攻沛邱然則王之言輕重必明矣故楚王卜交而沛邱存義渠君之魏公孫衍謂義渠君曰道遠臣不得復過矣請謁事情義渠君曰願聞之對曰中國無事於秦則秦且燒燭獲君之國中國為有事於秦則秦且輕使重幣而事君之國也義渠君曰謹聞令居無幾何五國伐秦陳軫謂秦王曰義渠君蠻夷之賢君王不如賂之以撫其心秦王曰善因以文繡千匹好女百人遺義渠君義渠君

致羣臣而謀曰此乃公孫衍之所謂也因起兵襲秦大敗秦人於李帛之下

史記秦使庶長疾與戰修魚虜其將申差敗趙公子渴韓太子奐斬首八萬二千齊湣王伐敗趙魏軍秦亦

伐敗韓與齊爭長

。事當秦惠王後八年

秦復欲攻魏先敗韓

申差軍斬首八萬諸侯震恐而張儀復說魏王曰魏地方不至千里卒不過三十萬地四平諸侯四通輻湊無名山大川之限從鄭至梁二百餘里車馳人走不待力

而至梁南與楚境西與韓境北與趙境東與齊境卒戍
四方守亭鄣者不下十萬梁之地勢固戰場也梁南與
楚而不與齊則齊攻其東東與齊而不與趙則趙攻其
北不合於韓則韓攻其西不親於楚則楚攻其南此所
謂四分五裂之道也且夫諸侯之為從者將以安社稷
尊主彊兵顯名也今從者一天下約為昆弟刑白馬以
盟洹水之上以相堅也而親昆弟同父母尚有爭錢財
而欲恃詐偽反覆蘇秦之餘謀其不可成亦明矣大王

不事秦秦下兵攻河外據卷衍酸棗劫衛取陽晉則趙
不南趙不南而梁不北梁不北則從道絕從道絕則大
王之國欲毋危不可得也秦折韓而攻梁韓怯於秦秦
韓為一梁之亡可立而須也此臣之所為大王患也為
大王計莫如事秦事秦則楚韓必不敢動無楚韓之患
則大王高枕而卧國必無憂矣且夫秦之所欲弱者莫
如楚而能弱楚者莫如梁楚雖有富大之名而實空虛
其卒雖多然而輕走易北不能堅戰悉梁之兵南面而

伐楚勝之必矣割楚而益梁虧楚而適秦嫁禍安國此
善事也大王不聽臣秦下甲士而東伐雖欲事秦不可
得矣且夫從人多奮辭而少可信說一諸侯而成封侯
是故天下之游談士莫不日夜搯腕瞋目切齒以言從
之便以說人主人主賢其辯而牽其說豈得無眩哉臣
聞之積羽沈舟羣輕折軸衆口鑠金積毀銷骨故願大
王審定計議且賜骸骨辟魏哀王於是乃倍從約而因
儀請成於秦犀首者魏之陰晉人也名衍姓公孫氏

與張儀不善張儀為秦之魏魏王相張儀犀首弗利故
令人謂韓公叔曰張儀已合秦魏矣其言曰魏攻南陽
秦攻三川魏王所以貴張子者欲得韓地也且韓之南
陽已舉矣子何不少委焉以為行功則秦魏之交可錯
矣然則魏必圖秦而棄儀收韓而相衍公叔以為便因
委之犀首以為功果相魏張儀走 張儀歸復相秦三
歲而魏復背秦為從秦攻魏取曲沃 十一年梲里疾
攻魏焦降之敗韓岸門斬首萬其將犀首走 韓宣惠

王十九年大破我岸門太子倉質於秦以和

戰國策秦韓戰于濁澤韓氏急公仲朋謂韓王曰與國
不可恃今秦之心欲伐楚王不如因張儀為和於秦賂
之以一名都與之伐楚此以一易二之計也韓王曰善
乃敝公仲之行將西講於秦楚王聞之大恐召陳軫而
告之陳軫曰秦之欲伐我久矣今又得韓之名都一而
具甲秦韓并兵南鄉此秦所以廟祠而求也今已得之
矣楚國必伐王聽臣為之敝四境之內選師言救韓令

戰車滿道路發信臣多其車重其幣使信王之救已韓
為不能聽我韓之德王也必不為鴈行以來是秦韓不
和兵雖至楚國不大病矣為能聽我絕和於秦秦必大
怒以厚怨於韓韓得楚救必輕秦輕秦其應秦必不敬
是我因秦韓之兵而免楚國之患也楚王大說乃倣四
境之內選師言救韓發信臣多車幣謂韓王曰敝邑雖
小已悉起之矣願大國遂肆意於秦敝邑將以楚殉韓
韓王大說乃止公仲公仲曰不可夫以實告我者秦也

以虛名救我者楚也恃楚之虛名輕絕強秦之敵必為天下笑矣且楚韓非兄弟之國也又非素約而謀伐秦矣秦欲伐楚楚以起師言救韓此必陳軫之謀也且王已使人報於秦矣今弗行是欺秦也夫輕強秦之禍而信楚之謀臣王必悔之矣韓王弗聽遂絕和於秦秦果大怒興師與韓氏戰於岸門楚救不至韓氏大敗韓氏之兵非削弱也民非愚蒙也兵為秦禽智為楚笑過聽於陳軫失計於韓朋也 秦攻陘韓使人馳南陽之地

秦已馳又攻陘韓因割南陽之地秦受地又攻陘陳軫
謂秦王曰國形不便故馳交不親故割今割矣而交不
親馳矣而兵不止臣恐山東之無以馳割事王者矣且
王求百金於三川而不可得求千金於韓一旦而具今
王攻韓是絕上交而固私府也竊為王不取也

史記魏哀王六年秦求立公子政為太子與秦會臨晉

列女傳秦立魏公子政為魏太子魏哀王使使者為太
子納妃而美王將自納焉曲沃負謂其子如耳曰王亂
于無別汝胡不匡之今魏不能強王又無義有禍必及
吾家汝言以盡忠忠以除禍不可失也如耳未遇間會

使于齊負因款王門而上書曰曲沃之老婦也心有所懷願以聞于王王召入負曰妾聞男女之別國之大節也今大王為太子求妃而自納之於後宮此毀貞女之行亂男子之別也自古聖王必正妃匹妃匹正則興不正則亂周之康王夫人晏出朝闕睢起興思得淑女以配君子夫睢鳩之鳥猶未嘗見乘居而匹處也今大王亂人道之始棄綱紀之大大國五六南有強楚西有橫秦而魏國居其間可謂僅存矣王不憂此從亂無別父子同女妾恐大王之國政危矣王曰然寡人不知也遂與太子妃而賞負三十鍾如耳還而爵之哀王勤行自修勞來國家而齊楚強秦不敢加兵焉

明年魏復事秦

秦欲伐齊齊楚從親於是張儀往相楚楚懷王聞張儀來虛上舍而自館之曰此辟陋之國子何以教之儀說

楚王曰大王誠能聽臣閉關絕約於齊臣請獻商於之地六百里使秦女得為大王箕帚之妾秦楚娶婦嫁女長為兄弟之國此北弱齊而西益秦也計無便此者楚王大說而許之羣臣皆賀陳軫獨弔之楚王怒曰寡人不興師發兵得六百里地羣臣皆賀子獨弔何也陳軫對曰不然以臣觀之商於之地不可得而齊秦合齊秦合則患必至矣楚王曰有說乎陳軫對曰夫秦之所以重楚者以其有齊也今閉關絕約於齊則楚孤秦奚貪

夫孤國而與之商於之地六百里張儀至秦必負王是
北絕齊交西生患於秦也而兩國之兵必俱至善為王
計者不若陰合而陽絕於齊使人隨張儀苟與吾地絕
齊未晚也不與吾地陰合謀計也楚王曰願陳子閉口
毋復言以待寡人得地乃以相印授張儀厚賂之於是
遂閉關絕約於齊使一將軍隨張儀張儀至秦佯失綏
墮車不朝三月楚王聞之曰儀以寡人絕齊未甚邪乃
使勇士至宋借宋之符北罵齊王齊王大怒折節而下

秦秦齊之交合張儀乃朝謂楚使者曰臣有奉邑六里
願以獻大王左右楚使者曰臣受令於王以商於之地
六百里不聞六里還報楚王楚王大怒發兵而攻秦陳
軫曰軫可發口言乎攻之不如割地反以賂秦與之并
兵而攻齊是我出地於秦取償於齊也王國尚可存楚
王不聽卒發兵而使將軍屈匄擊秦秦齊共攻楚斬首
八萬殺屈匄遂取丹陽漢中之地楚又復益發兵而襲
秦至藍田大戰楚大敗於是楚割兩城以與秦平

戰國策齊助楚攻秦取曲沃其後秦欲伐齊齊楚之交
善惠王患之謂張儀曰吾欲伐齊齊楚方懼子為寡人
慮之奈何張儀曰王其為臣約車并幣臣請試之張儀
南見楚王曰敝邑之王所說甚者無大大王唯儀之所
甚願為臣者亦無大大王敝邑之王所甚憎者無大齊
王唯儀之所甚憎者亦無大齊王今齊王之罪其於敝
邑之王甚厚敝邑欲伐之而大國與之懼是以敝邑之
王不得事令而儀不得為臣也大王苟能閉關絕齊臣

請使秦王獻商於之地方六百里若此齊必弱齊弱則必為王役矣則是北弱齊西德於秦而私商於之地以為利也則此一計而三利俱至楚王大說宣言之於朝廷曰不穀得商於之地方六百里羣臣聞見者畢賀陳軫後見獨不賀楚王曰不穀不煩一兵不傷一人而得商於之地六百里寡人自以為智矣諸士大夫皆賀子獨不賀何也陳軫對曰臣見商於之地不可得而患必至也故不敢妄賀王曰何也對曰夫秦所以重王者以

王有齊也今地未可得而齊先絕是楚孤也秦又何重
孤國且先出地絕齊秦計必弗為也先絕齊後責地且
必受欺於張儀受欺於張儀王必惋之是西生秦患北
絕齊交則兩國兵必至矣楚王不聽曰吾事善矣子其
弭口無言以待吾事楚王使人絕齊使者未來又重絕
之張儀反秦使人使齊齊秦之交陰合楚因使一將軍
受地於秦張儀至稱病不朝楚王曰張子以寡人不絕
齊乎乃使勇士往罵齊王張儀知楚絕齊也乃出見使

者曰從某至某廣從六里使者曰臣聞六百里不聞六里儀曰儀固以小人安得六百里使者反報楚王楚王大怒欲興師伐秦陳軫曰臣可以言乎王曰可矣軫曰伐秦非計也王不如賂之一名都與之伐齊是我亡於秦而取償於齊也楚國不尚全事王今已絕齊而責欺於秦是吾合齊秦之交也國必大傷楚王不聽遂舉兵伐秦秦與齊合韓氏從之楚兵大敗於杜陵故楚之土壤士民非削弱僅以救亡者計失於陳軫過聽於張儀

詛楚文又秦嗣王設用吉玉寘璧使其宗祝邵礬布愍
告于不顯大神巫咸呂底楚王熊相之多臯咎咎我先君
黔公及楚成王是繆力同心兩邦若壹絆呂敝敗衿呂
齊盟曰葉萬子孫毋相為不利親即不顯大神巫咸而
質焉今楚王熊相康回無道淫失甚亂寘麥競從變輸
盟刺內之剗黷虐不辜戮剔孕敝幽刺親賊拘圉其叔
父寘者寘室櫝棺之中外之剗冒改久心不畏皇天上
帝及不顯大神巫咸之光列威神而兼俗十八世之詛

盟率者侯之兵呂臨加我欲剗伐我社稷伐威我百牡
求蔑灋皇天上帝及不顯大神巫咸之卹呂圭玉義牲
速取吾邊城新郢及郟長救吾不設曰可今又悉興其
衆張矜億怒飾甲底兵奮士盛師呂偁我邊境將欲復
其貺迹惟是秦邦之羸衆敵賦鞞翰棧輿禮使介老將
之呂自救也亦應受皇天上帝及不顯大神巫咸之幾
靈德賜呂制楚師且復略我邊城設數楚王熊相之倂
盟犯詛箸者石章呂盟大神之威神

○集古錄王順伯云秦詛楚文凡三

曰久湫曰巫咸曰亞馳其詞則一惟告於神者隨號而異史記世家年表秦自穆公十八世惠文王與楚懷王同時爭霸此詛為懷王也懷王十一年六國共攻秦楚為從長今文曰熊相率諸侯之兵以臨加我後五年張儀以商於之地欺楚絕齊楚發兵攻文曰偏我邊境是也是歲秦遣庶長章拒楚文又曰使介老將之以自救是也此文之作當在惠王後元十三年楚懷王名槐相字蓋槐字之訛如順伯所論

史記十三年庶長章擊楚於丹陽虜其將屈匄斬首八

萬又攻楚漢中取地六百里置漢中郡楚圍雍氏

楚圍雍

氏有三此前役也當周赧王三年說見後

楚圍雍氏秦敗屈匄蘇代謂田軫

曰臣願有謁於公其為事甚完使楚利公成為福不成

亦為福今者臣立於門客有言曰魏王謂韓馮張儀曰
者秦將拔齊兵又進子來救寡人則可矣不救寡人寡
人弗能拔此特轉辭也秦韓之兵毋東旬餘則魏氏轉
韓從秦秦逐張儀交臂而事齊楚此公之事成也田軫
曰奈何使無東對曰韓馮之救魏之辭必不謂韓王曰
馮以為魏必曰馮將以秦韓之兵東却齊宋馮因搏三
國之兵乘屈丐之幣南割於楚故地必盡得之矣張儀
救魏之辭必不謂秦王曰儀以為魏必曰儀且以秦韓

之兵東距齊宋儀將搏三國之兵乘屈丐之弊南割於
楚名存亡國實代三川而歸此王業也公令楚王與韓
氏地使秦制和謂秦王曰請與韓地而王以施三川韓
氏之兵不用而得地於楚韓馮之東兵之辭且謂秦何
曰秦兵不用而得三川伐楚韓以窘魏魏氏不敢東是
孤齊也張儀之東兵之辭且謂何曰秦韓欲地而兵有
案聲威發於魏魏氏之欲不失齊楚者有資矣魏氏轉
秦韓爭事齊楚楚王欲而無與地公令秦韓之兵不用

而得地有一大德也秦韓之王劫於韓馮張儀而東兵以徇服魏公常執左券以責於秦韓此其善於公而惡

張子多資矣

紀年魏襄王七年楚景翠圍雍氏韓宣王卒秦助韓共敗楚屈丐。史注引

戰國

策楚絕齊齊舉兵伐楚楚陳軫謂楚王曰王不如以地東解於齊西講於秦王使陳軫之秦秦王謂軫曰子秦人也寡人與子故也寡人不佞不能親國事也故子棄寡人事楚王今齊楚相伐或謂救之便或謂救之不便子獨不可以忠為子主計以其餘為寡人乎陳軫曰王獨不聞吳人之遊楚者乎楚王甚愛之病故使人問之曰誠病乎意亦思乎左右曰臣又知其思與不思誠思則將吳吟今軫將為王吳吟王不聞夫管與之說乎有兩虎爭人而鬪管莊子將刺之管與止之曰虎者戾蟲人者甘餌今兩虎爭人而鬪小者必死大者必傷子待傷

虎而刺之則是一舉而兼兩虎也無刺一虎之勞而有刺兩虎之名齊楚今戰戰必敗敗王起兵救之有救齊之利而無伐楚之害計聽知覆逆者唯王可也計者事之本也聽者存亡之機計失而聽過能有國者寡也故曰計有一二者難恃聽無失本末者難惑史記韓魏相攻期年不解秦惠王欲救之問於左右左右或曰救之便或曰勿救便惠王未能為之決陳軫適至秦惠王曰子去寡人之楚亦思寡人不陳軫對曰王聞夫越人莊舄乎王曰不聞曰越人莊舄仕楚執珪有頃而病楚王曰舄故越之鄙細人也今仕楚執珪貴富矣亦思越不中謝對曰凡人之思故在其病也彼思越則越聲不思越則楚聲使人往聽之尚猶越聲也今臣雖棄逐之楚豈能無秦聲哉惠王曰善今韓魏相攻期年不解或謂寡人救之便或曰勿救便寡人不能決願子為主計之餘為寡人計之陳軫對曰亦嘗有以夫下莊子刺虎聞於王者乎莊子欲刺虎館豎子止之曰兩虎方且

食牛食甘必爭爭則必鬪鬪則大者傷小者死從傷而刺之一舉必有雙虎之名卞莊子以為然立須之有頃兩虎果鬪大者傷小者死莊子從傷者而刺之一舉果有雙虎之功今韓魏相攻期年不解是必大國傷小國亡從傷而伐之一舉必有兩實此猶莊子刺虎之類也臣主與王何異也惠王曰善卒弗救大國果傷小國亡秦興兵而伐大趙之此陳軫之計也。策言齊楚相伐史言韓魏相攻軫說則同故兩存之以俟考

秦

使庶長疾助韓而東攻齊到滿助魏攻燕 十四年伐

楚取召陵 秦要楚欲得黔中地欲以武關外易之楚

王曰不願易也願得張儀而獻黔中地秦王欲遣之口

弗忍言張儀乃請行惠王曰彼楚王怒子之負以商於

之地是且甘心於子張儀曰秦彊楚弱臣善靳尚尚得
事楚夫人鄭袖袖所言皆從且臣奉王之節使楚楚何
敢加誅假令誅臣而為秦得黔中之地臣之上願遂使
楚楚懷王至則囚張儀將殺之靳尚謂鄭袖曰子亦知
子之賤於王乎鄭袖曰何也靳尚曰秦王甚愛張儀而
不欲出之今將以上庸之地六縣賂楚以美人聘楚以
宮中善歌謳者為媵楚王重地尊秦秦女必貴而夫人
斥矣不若為言而出之於是鄭袖日夜言懷王曰人臣

者以懼從之資之金玉寶器奉以上庸六縣為湯沐邑
欲因張儀內之楚王楚王必愛秦女資強秦以為重挾
寶地以為資勢必為王妻以臨於楚王惑於虞樂必厚
尊敬親愛之而忘子子益賤而日疏矣鄭襄曰願委之
於公為之奈何曰子何不急言王出張子張子得出德
子無已時秦女必不來而秦必重子子內擅楚之貴外
結秦之交畜張子以為用子之子孫必為楚太子矣此
非布衣之利也鄭襄遂說楚王出張子 張儀之楚貧

二十七

南后鄭裒聞之大恐令人謂張子曰妾聞將軍之晉國
偶有金千斤進之左右以供芻秣鄭裒亦以金五百斤
張子辭楚王曰天下閉關不通未知見日也願王賜之
觴王曰諾乃觴之中飲再拜而請曰非有他人於此也
願王召所便習而觴之王曰諾乃召南后鄭裒而觴之
張子再拜而請曰儀有死罪於大王王曰何也曰儀行
天下徧矣未嘗見人如此其美而儀言得美人是欺王
也王曰子釋之吾固以為天下莫若是兩人也

韓非子
荆王所

愛妾有鄭袖者荆王新得美女鄭袖因教之曰王甚喜人之掩口也為近王必掩口美女入見近王因掩口王問其故鄭袖曰此固言惡王之臭及王與鄭袖美女三人坐袖因先誠御者曰王適有言必亟聽從王言美女前近王甚數掩口王勃然怒曰劓之御因揄刀而劓美人戰國策魏王遺楚王美人楚王說之夫人鄭襄知王之說新人也甚愛新人衣服玩好擇其所喜而為之宮室卧具擇其所善而為之愛之甚於王王曰婦人所以事夫者色也而妬者其情也今鄭襄知寡人之說新人也其愛之甚於寡人此孝子之所以事親忠臣之所以事君也鄭襄知王以已為不妬也因謂新人曰王愛子美矣雖然惡子之鼻子為見王則必揜子鼻新人見王因揜其鼻王謂鄭襄曰夫新人見寡人則揜其鼻何也鄭襄曰妾知也王曰雖惡必言之鄭袖曰其似惡聞王之臭也王曰悍哉令劓之無使逆命

楚王將出張子恐其敗已也斲

尚謂楚王曰臣請隨之儀事王不善臣請殺之楚小臣
靳尚之仇也謂張旄曰以張儀之智而有秦楚之用君
必窮矣君不如微要靳尚而殺之楚王必大怒儀也彼
儀窮則子重矣楚秦相難則魏無患矣張旄果令人要
靳尚刺之楚王大怒秦楚構兵而戰秦楚爭事魏張旄
果大重

史記張儀既出未去聞蘇秦死乃說楚王曰秦地半天
下兵敵四國被險帶河四塞以為固虎賁之士百餘萬

車千乘騎萬匹積粟如邱山法令既明士卒安難樂死
主明以嚴將智以武雖無出甲席卷常山之險必折天
下之脊天下有後服者先亡且夫為從者無以異於驅
羣羊而攻猛虎虎之與羊不格明矣今王不與猛虎而
與羣羊臣竊以為大王之計過也凡天下彊國非秦而
楚非楚而秦兩國交爭其勢不兩立大王不與秦秦下
甲據宜陽韓之上地不通下河東取成臯韓必入臣梁
則從風而動秦攻楚之西韓梁攻其北社稷安得毋危

且夫從者聚羣弱而攻至彊不料敵而輕戰國貧而數舉兵危亡之術也臣聞之兵不如者勿與挑戰粟不如者勿與持久夫從人飾辯虛辭高主之節言其利不言其害卒有秦禍無及為已是故願大王之孰計之秦西有巴蜀大船積粟起於汶山浮江以下至楚三千餘里舫船載卒一舫載五十人與三月之食下水而浮一日行三百餘里里數雖多然而不費牛馬之力不至十日而距扞關扞關驚則從境以東盡城守矣黔中巫郡非

王之有秦舉甲出武關南面而伐則北地絕秦兵之攻楚也危難在三月之內而楚待諸侯之救在半歲之外此其勢不相及也夫待弱國之救忘彊秦之禍此臣所以為大王患也大王嘗與吳人戰五戰而三勝陳卒盡矣偏守新城存民苦矣臣聞功大者易危而民敝者怨上夫守易危之功而逆彊秦之心臣竊為大王危之且夫秦之所以不出兵函谷十五年以攻齊趙者陰謀有合天下之心楚嘗與秦構難戰於漢中楚王不勝列侯

執珪死者七十餘人遂亡漢中楚王大怒興兵襲秦戰於藍田此所謂兩虎相搏者也夫秦楚相敵而韓魏以全制其後計無危於此者矣願大王孰計之秦下甲攻衛陽晉必大關天下之匈大王悉起兵以攻宋不至數月而宋可舉舉宋而東指則泗上十二諸侯盡王之有也凡天下而以信約從親相堅者蘇秦封武安君相燕即陰與燕王謀伐破齊而分其地乃詳有罪出走入齊齊王因受而相之居二年而覺齊王大怒車裂蘇秦於

市夫以一詐偽之蘇秦而欲經營天下混一諸侯其不可成亦明矣今秦與楚接境壤界固形親之國也大王誠能聽臣臣請使秦太子入質於楚楚太子入質於秦請以秦女為大王箕帚之妾効萬室之都以為湯沐之邑長為昆弟之國終身無相攻伐臣以為計無便於此者於是楚王已得張儀而重出黔中地與秦欲許之屈原曰前大王見欺於張儀張儀至臣以為大王烹之今縱弗忍殺之又聽其邪說不可懷王曰許儀而得黔中

美利也後而倍之不可故卒許張儀與秦親張儀去楚
因遂之韓說韓王曰韓地險惡山居五穀所生非菽而
麥民之食大抵飯菽藿羹一歲不收民不饜糟糠地不
過九百里無二歲之食料大王之卒悉之不過三十萬
而廝徒負養在其中矣除守徼亭鄣塞見卒不過二十
萬而已矣秦帶甲百餘萬車千乘騎萬匹虎賁之士跣
跣科頭貫頤奮戟者至不可勝計秦馬之良戎兵之衆
探前跋後蹄間三尋騰者不可勝數山東之士被甲蒙

胄以會戰秦人捐甲徒裼以趨敵左挈人頭右挾生虜
夫秦卒與山東之卒猶孟賁之與怯夫以重力相壓猶
烏獲之與嬰兒夫戰孟賁烏獲之士以攻不服之弱國
無異垂千鈞之重於鳥卵之上必無幸矣夫羣臣諸侯
不料地之寡而聽從人之甘言好辭比周以相飾也皆
奮曰聽吾計可以彊霸天下夫不顧社稷之長利而聽
湏臾之說詿誤人主無過此者大王不事秦秦下甲據
宜陽斷韓之上地東取成臯滎陽則鴻臺之宮桑林之

苑非王之有也夫塞成臯絕上地則王之國分矣先事
秦則安不事秦則危夫造禍而求其福報計淺而怨深
逆秦而順楚雖欲毋亡不可得也故為大王計莫如為
秦秦之所欲莫如弱楚而能弱楚者莫如韓非以韓能
彊於楚也其地勢然也今王西面而事秦以攻楚秦王
必喜夫攻楚以利其地轉禍而說秦計無便於此者韓
王聽儀計張儀歸報秦惠王封儀五邑號曰武信君使
張儀東說齊湣王曰天下彊國無過齊者大臣父兄般

衆富樂然而為大王計者皆為一時之說不顧百世之利從人說大王者必曰齊西有彊趙南有韓與梁齊負海之國也地廣民衆兵彊士勇雖有百秦將無奈齊何大王賢其說而不計其實夫從人朋黨比周莫不以從為可臣聞之齊與魯三戰而魯三勝國以危亡隨其後雖有戰勝之名而有亡國之實是何也齊大而魯小也今秦之與齊也猶齊之與魯也秦趙戰於河漳之上再戰而趙再勝秦戰於番吾之下再戰又勝秦四戰之後

趙之亡卒數十萬邯鄲僅存雖有戰勝之名而國已破矣是何也秦彊而趙弱今秦楚嫁女娶婦為昆弟之國韓獻宜陽梁効河外趙入朝澠池割河間以事秦大王不事秦秦驅韓梁攻齊之南地悉趙兵渡清河指博關臨菑即墨非王之有也國一日見攻雖欲事秦不可得也是故願大王孰計之也齊王曰齊僻陋隱居東海之上未嘗聞社稷之長利也乃許張儀張儀去西說趙王曰敝邑秦王使使臣効愚計於大王大王收率天下以

賓秦秦兵不敢出函谷關十五年大王之威行於山東
敝邑恐懼懾伏繕甲厲兵飾車騎習馳射力田積粟守
四封之內愁居懾處不敢動搖唯大王有意督過之也
今以大王之力舉巴蜀并漢中包兩周遷九鼎守白馬
之津秦雖僻遠然而心忿含怒之日久矣今秦有敝甲
凋兵軍於澠池願渡河踰漳據番吾會邯鄲之下願以
甲子合戰以正殷紂之事敬使使臣先聞左右凡大王
之所信為從者恃蘇秦蘇秦熒惑諸侯以是為非以非

為是欲反齊國而自令車裂於市夫天下之不可一亦明矣今楚與秦為昆弟之國而韓梁稱為東藩之臣齊獻魚鹽之地此斷趙之右臂也夫斷右臂而與人鬪失其黨而孤居求欲毋危豈可得乎今秦發三將軍其一軍塞午道告齊使興師渡清河軍於邯鄲之東一軍軍成臯驅韓梁軍於河外一軍軍於澠池約四國為一以攻趙趙服必四分其地是故不敢匿意隱情先以聞於左右臣竊為大王計莫如與秦王遇於澠池面相見而

口相結請案兵無攻願大王之定計趙王曰先王之時
奉陽君專權擅勢蔽欺先王獨擅綰事寡人居屬師傅
不與國謀計先王棄羣臣寡人年幼奉祀之日新心固
竊疑焉以為一從不事秦非國之長利也乃且願變心
易慮割地謝前過以事秦方將約車趨行適聞使者之
明詔趙王許張儀張儀乃去北之燕說燕昭王曰大王
之所親莫如趙昔趙襄子嘗以其姊為代王妻欲并代
約與代王遇於句注之塞乃令工人作為金斗長其尾

令可以擊人與代王飲陰告厨人曰即酒酣樂進熱啜反斗以擊之於是酒酣樂進熱啜厨人進斟因反斗以擊代王殺之王腦塗地其姊聞之因摩笄以自刺故至今有摩笄之山代王之亡天下莫不聞夫趙王之狼戾無親大王之所明見且以趙王為可親乎趙興兵攻燕再圍燕都而劫大王大王割十城以謝今趙王已入朝澠池効河間以事秦今大王不事秦秦下甲雲中九原驅趙而攻燕則易水長城非大王之有也且今時趙之

於秦猶郡縣也不敢妄舉師以攻伐今王事秦秦王必
喜趙不敢妄動是西有彊秦之援而南無齊趙之患是
故願大王孰計之燕王曰寡人蠻夷僻處雖大男子裁
如嬰兒言不足以采正計今上客幸教之請西面而事
秦獻恒山之尾五城燕王聽儀儀歸報未至咸陽而秦
惠王卒武王立

戰國策張儀相秦謂昭雎曰楚無鄢郢漢中有所更得
乎曰無有曰無昭過陳軫有所更得乎曰無所更得張

儀曰為儀謂楚王逐昭過陳軫請復鄢郢漢中昭雖歸
報楚王楚王說之有人謂昭過曰甚矣楚王不察於名
者也韓求相工陳籍而周不聽魏求相綦毋恢而周不
聽何以也周曰是列縣畜我也今楚萬乘之強國也大
王天下之賢王也今儀曰逐君與陳軫而王聽之是楚
自待不如周而儀重於韓魏之王也且儀之所行有功
名者秦也所欲貴富者魏也欲為攻於魏必南伐楚故
攻有道外絕其交內逐其謀臣陳軫夏人也習於三晉

之事故逐之則楚無謀臣矣今君能用楚之衆故亦逐之則楚衆不用矣此所謂內攻之者也而王不知察今君何不見臣於王請為王使齊交不絕儀聞之其効郢郢漢中必緩矣是昭雎之言不信也王必薄之 張儀欲以漢中與楚請秦王曰有漢中蠹種樹不處者人必害之家有不宜之財則傷今漢中南邊為楚利此國累也甘茂謂王曰地大者固當憂乎天下有變王割漢中以楚和楚必畔天下而與王王今以漢中與楚即天下

有變王何以市楚也

史記武王自為太子時不說張儀及即位羣臣多讒張儀曰無信左右賣國以取容秦必復用之恐為天下笑

諸侯聞張儀有郤武王皆畔衡復合從

戰國策鄭彊之走張儀於秦曰

儀之使者必之楚矣故謂太宰曰公留儀之使者彊請西圖儀於秦故因西請秦王曰張儀使人致上庸之地故使使臣再拜謁秦王秦王怒張儀走張儀走之魏魏將迎之張丑諫於王欲勿納不得於王張丑退復諫於王曰王亦聞老妾事其主婦者乎子長色衰重嫁而已今臣之事王若老妾之事其主婦者魏王因不納張儀。此云不納儀恐非此時事

秦武王元年群臣日夜惡張儀未已而

齊讓又至張儀懼誅乃因謂秦武王曰儀有愚計願効之王曰奈何對曰為秦社稷計者東方有大變然後王可以多割得地也今聞齊王甚憎儀儀之所在必興師伐之故儀願乞其不肖之身之梁齊必興師而伐梁梁齊之兵連於城下而不能相去王以其閒伐韓入三川出兵函谷而毋伐以臨周祭器必出挾天子按圖籍此王業也秦王以為然乃具革車三十乘入儀之梁齊果興師伐之梁哀王恐張儀曰王勿患也請令罷齊兵乃

使其舍人馮喜之楚借使之齊謂齊王曰王甚憎張儀雖然亦厚矣王之託儀於秦也齊王曰寡人憎儀儀之所在必興師伐之何以託儀對曰是乃王之託儀也夫儀之出也固與秦王約曰為王計者東方有大變然後王可以多割得地今齊王甚憎儀儀之所在必興師伐之故儀願乞其不肖之身之梁齊必興師伐之齊梁之兵連於城下而不能相去王以其間伐韓入三川出兵函谷而無伐以臨周祭器必出挾天子案圖籍此王業

也秦王以為然故具革車三十乘而入之梁也今儀入
梁王果伐之是王內罷國而外伐與國廣鄰敵以內自
臨而信儀於秦王也此臣之所謂託儀也齊王曰善乃
使解兵

戰國策犀首以梁與齊戰於承匡而不勝張儀謂梁王
不用臣言以危國王因相儀儀以秦梁之齊合橫親犀
首欲敗謂衛君曰衍非有怨於儀值所以為國者不同
耳君必解衍衛君為告儀儀許諾因與之參坐於衛君

之前犀首跪行為儀千秋之祝明日張子行犀首送之
至於齊疆齊王聞之怒於儀曰行也吾讎而儀與之俱
是必與儀鬻吾國矣遂不聽田需貴於魏王惠子曰
子必善左右今夫楊橫樹之則生倒樹之則生折而樹
之又生然使十人樹楊一人拔之則無生楊矣故以十
人之衆樹易生之物然而不勝一人者何也樹之難而
去之易也今子雖自樹於王而欲去子者衆則子必危
矣公孫行為魏將與其相田需不善季子為行謂梁

王曰獨不見夫服牛驂驥乎不可以行百步今王以衍
為可使將故用之也而聽相之計是服牛驂驥也牛馬
俱死而不能成其功王之國必傷矣願王察之 犀首
見梁君曰臣盡力竭智欲以為王廣土取尊名田需從
中敗君王又聽之是臣終無成功也需亡臣將侍需侍
臣請亡王曰需寡人之股掌之臣也為子之不便也殺
之亡之母謂天下何內之無若羣臣何也今吾為子外
之令毋敢入子之事入子之事者吾為子殺之亡之胡

如犀首許諾於是東見田嬰與之約結名文子而相之
魏身相於韓 蘇代為田需說魏王曰臣請問文之為
魏孰與其為齊也王曰不如其為齊也行之為魏孰與
其為韓也王曰不如其為韓也而蘇代曰衍將右韓而
左魏文將右齊而左魏二人者將用王之國舉事於世
中道而不可且王無所聞之矣王之國雖滲樂而從之
可也王不如舍需於側以稽二人者之所為二人者曰
需非吾人也吾舉事而不利於魏需必挫我於王二人

者必不敢有外心矣二人者之所為之利於魏與不利於魏王厝需於側以稽之臣以為身利而國便於事王曰善果厝需於側

韓非子陳需魏王之臣也善於荆王而令荆攻魏荆攻魏陳需因請為魏

王行解之因以荆勢相魏

史記張儀魏章皆歸於魏魏相田需死楚害張儀犀首薛公楚相昭魚謂蘇代曰田需死吾恐張儀犀首薛公有一人相魏者也代曰然相者欲誰而君便之昭魚曰吾欲太子之自相也代曰請為君北必相之昭魚曰奈

何對曰君其為梁王代請說君昭魚曰奈何對曰代也從楚來昭魚甚憂曰田需死吾恐張儀犀首薛公有一人相魏者也代曰梁王長主也必不相張儀張儀相必右秦而左魏犀首相必右韓而左魏薛公相必右齊而左魏梁王長主也必不便也王曰然則寡人孰相代曰莫若太子之自相太子之自相是三人者皆以太子為非常相也皆將務以其國事魏欲得丞相璽也以魏之彊而三萬乘之國輔之魏必安矣故曰莫若太子之自

張儀與澤之所不能得於薛公者而公請之以自重也
史記張儀相魏一歲卒於魏也 張儀已卒之後犀首
入相秦嘗佩五國之相印為約長 太史公曰三晉多
權變之士夫言縱橫彊秦者大抵皆三晉之人也夫張
儀之行事甚於蘇秦然世惡蘇秦者以其先死而儀振
暴其短以扶其說成其衡道要之此兩人真傾危之士
哉

繹史卷一百二十

欽定四庫全書

繹史卷一百二十一

靈壁縣知縣馬驕撰

靖郭君相齊

史記田嬰者齊威王少子而齊宣王庶弟也田嬰自威王時任職用事宣王九年田嬰相齊宣王卒湣王即位

三年而封田嬰於薛

紀年梁惠王後元十三年齊威王封田嬰於薛十月齊城薛十四

年薛子嬰來朝

十五年齊威

王薨○索隱引此與史不同

戰國策齊王夫人死有七孺子者皆近薛公欲知王所

欲立乃獻七珥美其一明日視美珥所在勸王立為夫人

韓非子靖郭君之相齊也王后死未知所置乃獻玉珥以知之一曰薛公相齊齊威王夫人死中有十孺子皆貴於王薛公欲知王所欲立而請置一人以為夫人王聽之則是說行而重於置夫人也王不聽是說不行而輕於置夫人也欲先知王之所欲置以勸王置之於是為十玉珥而美其一而獻之王以賦十孺子明日坐視

美珥之所在而勸王以為夫人 靖郭君相齊與故人
久語則故人富懷左右刷則左右重久語懷刷小資也
猶以成富況於吏勢乎

戰國策靖郭君謂齊王曰五官之計不可不日聽也而
數覽王曰說吾而厭之今與靖郭君

韓非子田嬰相齊人有說王者曰終歲之計王不一以
數日之間自聽之則無以知吏之姦邪得失也王曰善
田嬰聞之即遽請於王而聽其計王將聽之矣田嬰令

官具押券斗石叅升之計王自聽計計不勝聽罷食後復坐不復暮食矣田嬰復謂曰羣臣所終歲日夜不敢偷怠之事也王以一夕聽之則羣臣有為勸勉矣王曰諾俄而王已睡矣吏盡榆刀削其押券升石之計王自聽之亂乃始生成驪謂齊王曰王太仁太不忍人王曰太仁太不忍人非善名耶對曰此人臣之善也非人主之所行也夫人臣必仁而後可與謀不忍人而後可近也不仁則不可與謀忍人則不可近也王曰然則寡

人安所太仁安不忍人對曰王太仁於薛公而太不忍於諸田太仁薛公則大臣無重太不忍諸田則父兄犯法大臣無重則兵弱於外父兄犯法則政弱於內兵弱於外政弱於內此亡國之本也

戰國策齊將封田嬰於薛楚王聞之大怒將伐齊齊王有轍志公孫閑曰封之成與不非在齊也又將在楚閑說楚王令其欲封公也又甚於齊嬰子曰願委之於子公孫閑謂楚王曰魯宋事楚而齊不事者齊大而魯宋

小王獨利魯宋之小不惡齊大何也夫齊之削地而封田嬰是其所以弱也願勿止楚王曰善因不止靖郭君將城薛客多以諫靖郭君謂謁者無為客通齊人有請者曰臣請三言而已矣孟一言臣請烹靖郭君因見之客趨而進曰海大魚因反走君曰客有於此客曰鄙臣不敢以死為戲君曰亡更言之對曰君不聞大魚乎網不能止鉤不能牽蕩而失水則螻蟻得意焉今夫齊亦君之水也君長齊奚以薛為夫齊雖隆薛之城到於

天猶之無益也君曰善乃輟城薛

韓非子同

靖郭君善

齊貌辯齊貌辯之為人也多疵門人弗說士尉以証靖郭君靖郭君不聽士尉辭而去孟嘗君又竊以諫靖郭君大怒曰剗而類破吾家苟可憚齊貌辯者吾無辭為之於是舍之上舍令長子御之旦暮進食數年威王薨宣王立靖郭君之交大不善於宣王辭而之薛與齊貌辯俱留無幾何齊貌辯辭而行請見宣王靖郭君曰王之不說嬰甚公往必得死焉齊貌辯曰固不求生也請

必行靖郭君不能止齊貌辯行至齊宣王聞之藏怒以待之齊貌辯見宣王曰子靖郭君之所聽愛夫齊貌辯曰愛則有之聽則無有王之方為太子之時辯謂靖郭君曰太子相不仁過頤豕視若是者信反不若廢太子更立衛姬嬰兒郊師靖郭君泣而曰不可吾不忍也若聽辯而為之必無今日之患也此為一至於薛昭陽請以數倍之地易薛辯又曰必聽之靖郭君曰受薛於先王雖惡於後王吾獨謂先王何且先王之廟在薛吾豈

可以先王之廟與楚乎又不肯聽辯此為二宣王太息
動於顏色曰靖郭君之於寡人一至此乎寡人少殊不
知此客肯為寡人來靖郭君乎齊貌辯對曰敬諾靖郭
君衣威王之衣冠舞其劔宣王自迎靖郭君於郊望之
而泣靖郭君至因請相之靖郭君辭不得已而受之七
日謝病強辭不得三日而聽當是時靖郭君可謂能自
知人矣能自知人故人非之不為沮此齊貌辯之所以
外生樂患趣難者也

○鮑彪改威王為宣王宣王為閔王因史記之誤也今依原本校正

呂覽齊貌辨作劑貌辨郊師作校師靖郭作靜郭過頤
豕視作過頤泳視信反作倍反用字多異然亦稱威宣
不云宣閔益徵史記之
誤而鮑氏之妄改矣

繹史卷一百二十一

欽定四庫全書

繹史卷一百二十二

靈壁縣知縣馬驥撰

周分東西

兩周之爭附

史記考王封其弟於河南是為桓公以續周公之官職

桓公卒子威公代立威公卒子惠公代立乃封其少子

於鞏以奉王號東周惠公

帝王世紀考哲王封弟揭於河南續周公之官是為西周

桓公

世本西周桓公名揭居河南東周惠公名班居洛陽

呂氏春秋甯越中牟之鄙人也苦耕稼之勞謂其友曰

何為而可以免此苦也其友曰莫如學學三十歲則可以達矣甯越曰請以十歲人將休吾將不敢休人將卧吾將不敢卧十五歲而周威公師之矢之速也而不過二里止也步之遲也而百舍不止也今以甯越之材而久不止其為諸侯師豈不宜哉

○說苑略同漢書
儒家甯越一篇

說苑周威公問於甯子曰取士有道乎對曰有窮者達之亡者存之廢者起之四方之士則四面而至矣窮者不達亡者不存廢者不起四方之士則四面而畔矣夫

城固不能自守兵利不能自保得士而失之必有其間
夫士存則君尊士失則君卑周威公曰士壹至如此乎
對曰君不聞夫楚平王有士曰楚僂胥邱負客王將殺
之出亡之晉晉人用之是為城濮之戰又有士曰苗賁
皇王將殺之出亡走晉晉人用之是為鄢陵之戰又有
士曰上解于王將殺之出亡走晉晉人用之是為兩堂
之戰又有士曰伍子胥王殺其父兄出亡走吳闔閭用
之於是興師而襲郢故楚之大得罪於梁鄭宋衛之君

猶未遽至於此也此四得罪於其士三暴其民骨一亡其國由是觀之士存則國存士亡則國亡子胥怒而亡之申包胥怒而存之士胡可無貴乎

莊子田開之見周威公威公曰吾聞祝腎學生吾子與祝腎遊亦何聞焉田開之曰開之操拔篲以待門庭亦何聞於夫子威公曰田子無讓寡人願聞之開之曰聞之夫子曰善養生者若牧羊然視其後者而鞭之威公曰何謂也田開之曰魯有單豹者巖居而水飲不與民

其利行年七十而猶有嬰兒之色不幸遇餓虎餓虎殺而食之有張毅者高門縣簿無不走也行年四十而有內熱之病以死豹養其內而虎食其外毅養其外而病攻其內此二子者皆不鞭其後者也

呂氏春秋晉太史屠黍見晉之亂也見晉公之驕而無德義也以其圖法歸周周威公見而問焉曰天下之國孰先亡對曰晉先亡威公問其故對曰臣比在晉也不敢直言示晉公以天妖日月星辰之行多以不當曰是

何能為又示以人事多不義百姓皆鬱怨曰是何能傷
又示以鄰國不服賢良不舉曰是何能害如是是不知
所以亡也故臣曰晉先亡也居三年晉果亡威公又見
屠黍而問焉曰孰次之對曰中山次之威公問其故對
曰天生民而令有別有別人之義也所異於禽獸麋鹿
也君臣上下之所以立也中山之俗以晝為夜以夜繼
日男女切倚固無休息康樂歌淫好悲其丰弗知惡此
亡國之風也臣故曰中山次之居二年中山果亡威公

又見屠黍而問焉曰孰次之屠黍不對威公固問焉對
曰君次之威公乃懼求國之長者得義蒔田邑而禮之
得史麟趙駢以為諫臣去苛令三十九物以告屠黍對
曰其尚終君子之身乎曰臣聞之國之興也天遺之賢
人與極言之士國之亡也天遺之亂人與善諛之士威
公薨肆九月不得葬周乃分為二

說苑
作屠餘

史記趙成侯七年與韓攻周八年與韓分周以為兩

括地

志史紀周顯王二年西周惠公封少子班於鞏為東周
其子武公為秦所滅。正義引據此東周之分在顯王

二年即趙世家所謂分周為兩者周本紀無此事是史
疎也 韓非子公子朝周太子也弟公子根甚有寵於
君君死遂以東周叛分為兩國 紀年魏惠成王十
一年東周惠公傑薨後元八年九鼎淪泗沒於淵

王赧時東西周分治王赧徙都西周

呂氏春秋周武君使人刺伶悝於東

周伶悝僵令其子速哭曰以誰刺我父也刺者聞以為死也周以為不信因厚罪之

西周武公

之共太子死有五庶子毋適立司馬翦謂楚王曰不如
以地資公子咎為請太子左成曰不可周不聽是公之
知困而交疏於周也不如請周君孰欲立以微告翦翦
請令楚賀之以地果立公子咎為太子

戰國策周共太子死有五庶子皆愛之而無適立也司馬翦謂楚王曰何不封公子咎而為之請太子左成謂司馬翦曰周君不聽是公之智困而交絕於周也不如謂周君曰孰欲立也微告翦翦令楚王資之以地公若欲為太子因令人謂相國御展子廩夫空曰王類欲令若為之此健士也居中不便於相國相國令之為太子

○此策原在東周而史云西周未知所據

司寇布為周最謂周君曰君使

人告齊王以周最不肯為太子也臣為君不取也函冶

氏為齊太公買良劍公不知善歸其劍而責之金越人請買之千金折而不賣將死而屬其子曰必無獨知今君之使最為太子獨知之契也天下未有信之者也臣恐齊王之謂君實立果而讓之於最以嫁之於齊君為多巧最為多詐君何不買信貸哉奉養無有愛於最也使天下見之 東周與西周戰韓救西周為東周謂韓王曰西周者故天子之國也多名器重寶按兵而勿出可以德東周西周之寶可盡矣 東周與西周爭西周

欲和於楚韓齊明謂東周君曰臣恐西周之與楚韓寶
令之為已求地於東周也不如謂楚韓曰西周之欲入
寶持二端今東周之兵不急西周西周之寶不入楚韓
楚韓欲得寶即且趣我攻西周西周寶出是我為楚韓
取寶以德之也西周弱矣東周欲為稻西周不下水
東周患之蘇子謂東周君曰臣請使西周下水可乎乃
往見西周之君曰君之謀過矣今不下水所以富東周
也今其民皆種麥無他種矣君若欲害之不若一為下

水以病其所種下水東周必復種稻種稻而復奪之若是則東周之民可令一仰西周而受命於君矣西周君曰善蘇子亦得兩國之金也宮他亡西周之東周盡輸西周之情於東周東周大喜西周大怒馮睢曰臣能殺之君子金三十斤馮睢且使人操金與書間遺宮他曰告宮他事可成勉成之不可成亟亡歸事父且泄自令身死因使人告東周之候曰今夕有姦人當入者矣候得而獻東周東周立殺宮他周相呂倉見客於周

君前相工師籍恐客之傷已也因令人謂周君曰客者
辯士也然而所以不可者好毀人周文君免工師籍
相呂倉國人不說也君有閔閔之心謂周文君曰國必
有誹譽忠臣今誹在已譽在上宋君奪民時以為臺而
民非之無忠臣以掩蓋之也子罕釋相為司空民非子
罕而善其君齊桓公宮中女市女問七百國人非之管
仲故為三歸之家以掩桓公非自傷於民也春秋記臣
弑君者以百數皆大臣見譽者也故大臣得譽非國家


之美也故衆庶成強增積如山周君遂不免 杜赫欲
重景翠於周謂周君曰君之國小盡君之重寶珠玉以
事諸侯不可不察也譬之如張羅者張之於無鳥之所
則終日無所得矣張於多鳥處則又駭鳥矣必張於有
鳥無鳥之際然後能多得鳥矣今君將施於大人大人
輕君施於小人小人無可以求又費財焉君必施於今
之窮士不必且為大人者故能得欲矣

呂氏春秋杜赫以安天下說周昭文君昭文君謂杜赫

曰願學所以安周杜赫對曰臣之所言者不可則不能
安周矣臣之所言者可則周自安矣此所謂以弗安而
安者也 公子沓相周申向說之而戰公子沓嘗之曰
申子說我而戰為吾相也夫申向曰向則不肖雖然公
子年二十而相見老者而使之戰請問孰病哉公子沓
無以應

戰國策溫人之周周不納客即對曰主人也問其巷而
不知也吏因囚之君使人問之曰子非周人而自謂非

客何也對曰臣少而誦詩詩曰普天之下莫非王土率
土之濱莫非王臣今周君天下則我天子之臣而又為
客哉故曰主人君乃使吏出之



欽定四庫全書

史部

綱目卷一百二十三至
七

詳校官檢討臣羅國俊

編修臣裴謙覆勘

覆校官博士臣劉光第

校對官中書臣田尹衡

校對官典簿臣劉景岳

謄錄舉人臣陳賓

謄錄監生臣沈毓鳳

欽定四庫全書

釋史卷一百二十三

靈璧縣知縣馬驥撰

秦并巴蜀

史記惠文王後九年司馬錯伐蜀滅之
苴蜀相攻擊
各來告急於秦秦惠王欲發兵以伐蜀以為道險狹難
至而韓又來侵秦秦惠王欲先伐韓後伐蜀恐不利欲
先伐蜀恐韓襲秦之敝猶豫未能決

戰國策司馬錯與張儀爭論於秦惠王前司馬錯欲伐

蜀張儀曰不如伐韓王曰請聞其說對曰親魏善楚下兵三川塞轆轤氏之口當屯留之道魏絕南陽楚臨南鄭秦攻新城宜陽以臨二周之郊誅周主之罪侵楚魏之地周自知不救九鼎寶器必出據九鼎按圖籍挾天子以令天下天下莫敢不聽此王業也今夫蜀西僻之國而戎狄之長也敝兵勞衆不足以成名得其地不足以為利臣聞爭名者於朝爭利者於市今三川周室天下之市朝也而王不爭焉顧爭於戎狄去王業遠矣

司馬錯曰不然臣聞之欲富國者務廣其地欲強兵者務富其民欲王者務博其德三資者備而王隨之矣今王之地小民貧故臣願從事於易夫蜀西僻之國也而戎狄之長也而有桀紂之亂以秦攻之譬如使豺狼逐羣羊也取其地足以廣國也得其財足以富民繕兵不傷衆而彼已服矣故拔一國而天下不以為暴利盡四海諸侯不以為貪是我一舉而名實兩附而又有禁暴正亂之名今攻韓劫天子劫天子惡名也而未必利也

又有不義之名而攻天下之所不欲危臣請謁其故周天下之宗室也齊韓周之與國也周自知失九鼎韓自知亡三川則必將二國并力合謀以因於齊趙而求解乎楚魏以鼎與楚以地與魏王不能禁此臣所謂危不如伐蜀之完也惠王曰善寡人聽子卒起兵伐蜀十月取之遂定蜀蜀主更號為侯而使陳莊相蜀蜀既屬秦益強富厚輕諸侯

華陽國志周顯王之子蜀王有褒漢之地因獵谷中與

秦惠王遇惠王以金一笥遺蜀王王報珎玩之物物化為土惠王怒羣臣賀曰天奉我矣王將得蜀土地惠王喜乃作石牛五頭朝瀉金其後曰牛使金有養卒百人蜀人說之使使請石牛惠王許之乃遣五丁迎石牛既不便金怒遣還之乃嘲秦人曰東方牧犢兒秦人笑之曰吾雖牧犢當得蜀也武都有一丈夫化為女子美而豔蓋山精也蜀王納為妃不習水土欲去王必留之乃為東平之歌以樂之無幾物故蜀王哀之乃遣五丁之

武都擔土為妃作塚蓋地數畝高七丈上有石鏡後王
悲悼作史邪歌龍歸之曲周顯王二十二年蜀王使朝
秦秦惠王數以美女進蜀王感之故朝焉惠王知蜀王
好色許嫁五女於蜀蜀遣五丁迎之還梓潼見一大蛇
入穴中一人覽其尾掣之不禁至五人相助大呼拽蛇
山崩時壓殺五人及秦五女蜀王痛傷作思妻臺蜀王
別封弟葭萌於漢中號苴侯命其邑曰葭萌焉苴侯與
巴王為好巴與蜀讎故蜀王怒伐苴侯苴侯奔巴求救

於秦秦惠王方欲謀楚羣臣議曰夫蜀西僻之國戎狄
為鄰不如伐楚司馬錯中尉田真黃曰蜀有桀紂之亂
其國富饒得其布帛金銀足給軍用水通於楚有巴之
勁卒浮大船舶以東向楚楚地可得得蜀則得楚楚巴
則天下并矣惠王曰善周慎王五年秋秦大夫張儀司
馬錯都尉墨等從石牛道伐蜀蜀王自於葭萌拒之敗
績王遁走至武陽為秦軍所害其傅相及太子退至逢
鄉死於白鹿山冬十月蜀平司馬錯等因取葭與巴馬

鼎錄張儀伐蜀鑄一鼎高三尺文曰定蜀 史記十一年公子通封於蜀十四年丹犁臣蜀相壯殺蜀侯來降

武王元年誅蜀相壯伐義渠丹犁 昭襄王六年蜀侯輝反司馬錯定蜀 周赧王元年秦

惠王封子通國為蜀侯以陳壯為相置巴郡以張若為蜀國守戎伯尚強乃移秦民萬家實之三年巴蜀置漢中郡六年陳壯反殺蜀侯通國秦遣庶長甘茂張儀司馬錯復伐蜀誅陳壯七年封子暉為蜀侯司馬錯率巴蜀衆十萬大船船萬艘米六百萬斛浮江伐楚取商於之地為黔中郡十四年蜀侯暉祭山川獻饋於秦王暉

後母害其寵加毒以進王王將嘗之後母曰饋從二千
里來當試之王與近臣近臣即斃王大怒遣司馬錯賜
惲劔使自裁惲懼夫婦自殺蜀人葬惲郭外十五年王
封其子綰為蜀侯十五年聞惲無罪冤枉死使使喪入
葬之郭內三十年疑蜀侯綰反王復誅之但置蜀守張
若因取笮及其江南地焉

後漢書秦昭襄王時有一白虎常從羣虎數游秦蜀巴
漢之境傷害千餘人昭王乃重募國中有能殺虎者賞

邑萬家金百鎰時有巴郡閭中夷人能作白竹之弩乃登樓射殺白虎昭王嘉之而以其夷人不欲加封乃刻石盟要使夷人頃田不租十妻不算傷人者論殺人者得以俸錢贖死盟曰秦犯夷輸黃龍一雙夷犯秦輸清酒一鍾夷人安之

華陽國志秦孝文王以李冰為蜀守冰能知天文地理謂汶山為天彭門乃至湔及縣見兩山對如闕因號天彭關髣髴若見神遂從上立祠三所祭用三牲珪璧沈

潰冰乃壅江作壩穿郾江檢江別支流雙過郡下以行
舟船又溉灌三郡開稻田於是蜀沃野千里號為陸海
外作石犀五頭以厭水精穿石犀溪於江南命曰犀牛
里乃自前堰上分穿羊摩江灌江西於玉女房下自涉
郵作三石人立三水中與江神要水竭不至足盛不沒
肩時青衣有沫水出蒙山下伏行地中會江南安觸山
臨溷崖水脈漂疾破害舟船歷代患之冰發卒鑿平溷
崖通正水道或曰冰鑿崖時水神怒冰乃操刀入水中

與神鬪至今蒙福又識齊水脈穿廣都鹽井諸陂池蜀

於是盛有養生之饒焉

水經注秦昭王使李冰為蜀守開成都兩江溉田萬頃神歲取

童女二人為婦冰以其女與神為婚徑至神祠勸神酒酒杯恒澹澹冰厲聲以責之因忽不見良久有兩牛鬪於江岸傍有閒冰還流汗謂官屬曰吾鬪疲極當相助也南向腰中正白者我綬也主簿刺殺北面者江神遂死蜀人慕其氣決凡壯健者因名冰兒也

釋史卷一百二十三